



partii naleraq

UKA 2017/018-01

29-09-2017

**Inissani attartortittakkani ineqarnermut tapiissutit pillugit Inatsisartut inatsisaannut allannguut nr. xx.xxx.2017.imeersoq.**

(Katissimasap aapparissalluunniit toquneranut atatillug pissutsillu allatigut allanngorneranni ineqarnermut taperqartitsisarneq)

(Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq)

Inissani attartortittakkani ineqarnermut tapiissutit pillugit Inatsisartut inatsisaannut allannguutissatut siunnersuut Partii Naleraq sinnerlugu imannak oqaaseqarfigissuarput.

Partii naleqqamiit inuit atugarliortut arlaatigulluunniit inuunerminni artorsaateqarlutik ikiortariaqalersimasut sapinngisamik pitsaasumik ikiorserneqarnissaat pingaartittuaannarparput.

Taamaattumik assut nuannaarutingaarput Naalakkersuisut maanna siunnersuuteqarmata, inuit soorlu siunnersuummi oqaaseqaatini ineqarnermut tapiissutit pillugit periarfissat ilaatigut attartortoq inatsisitigut pisinnaatitaaffeqartinneqalissasoq, inoqutigiinni aapparissap aapparissatulluunniit inooqatigisap toqukkut qimagunneratigut ineqarnermut tapiissutit pigiinnarnissaannut.

Tamannalu aamma atuuttoq inuttut atukkat allanngornerini, soorlu avinnermi imaluunniit aapparissatut inooqatigisap ulloq unnuarlu angerlarsimaffimmut nuunnerani, meeqqat illoqarfimmut allamut ilinniariartormerminni nuunneranni, meeqqap innarluutillit najugaqarfiup avataanut inissinneqarnerani taamatulluunniit assigusumik pisoqarnerani.

Inatsisissatut siunnersuut akuerineqarpat attartortoq pisinnaatitaaffeqalissooq inuttut atukkatigut allanngortoqarnerata kingorna qaammatini arfinilinni ineqarnermut tapiissutit tigummiinnarsinnaalissallugit. Qaammatini arfinilinni killiliussaq naatsorsorneqassooq ulloq taanna aapparissap aapparissatulluunniit inooqatigisap toqukkut qimagunneraniit imaluunniit inuttut atukkat allanngorneriniit.

Aamma qaammatit arfinillit qaangiunneriniit qaammatit 24-it tungaannut ineqarnermut tapiissutinik pisartakkat ingerlatiinnarsinnaanerit piumasaqaatitaqartoq nassuiaatini erseqqissarneqarpoq, tassa attartortoq pinngitsoorani inimik allamik inissarsiorsimassasoq aammalu tamanna kommunalbestyrelsimut uppernarsassangaa inuttut atukkat allanngorneriniit qaammatit arfinillit qaangiutsinnagit.

Aamma iluaraarput aaliangersakkat qulaani taaneqartut, tassa ineqarnermut tapit inissarsiornerup nalaani qaammatit 24-illuunniit qaangiukkaluarpata tapit pigiinnarsinnaaneri pillugit kommunalbestyrelse immikkut aaliangiisinnaatitaassamat.

Uani siunnersuummi eqqaanngitsoorsinnaanngilagut inuit ilaqutariillu nappaammik eqqugaasimaneq pissutigalugu danmark-imut allamulluunniit katsorsartikkiartorlutik inigisaminniit sivikinnerusumik sivilisunerumilluunniit qimagussimasariaqalertartut immikkut ittumik inigisamut tapiiffigineqarlutik ikiorserneqarsinnaanerat periarfissinneqartariaqartut isumaqaratta.

Tassami ilaqutariit tassanngaannaq taama eqqorneqartut ilaatigut naatsorsuutiginnigilluinnakkamik aamma aningaasaqarnerup tungaatigut eqqornerlungaasarmata, allat siornatigulluunniit boligsikringimik pisimannngisaannartut tassanngaannaq aamma ineqarnerup tungaatigut ajornartorsiulertarmata.

Taama oqaaseqarluta siunnersuut tunngaviatigut taperserlugu ataatsimiititaliami susassaqartumi suliap aappassaanneeraneqannginnerani suliarineqarnissaa inassutigaarput.

Anthon Frederiksen